

Partido AVP:

Fundeshi di nos Status Aparte

....De principiële erkenning van het recht der volken van het Koninkrijk, hun verhouding met Nederland en onderling zelfstandig mede te regelen ligt opgesloten, of juist gezegd, is uitgangspunt van de Koninklijke rede van 6 december 1942...(Shon A Eman na entrega di e mocion 18 di maart 1948.)

E lucha pa nos Status Aparte a cuminsa na inicio di siglo pasa ora cu Henny Eman sr. a cuminsa haci e pueblo di Aruba consciente di un situacion cu no tabata husto. E gobierno di Corsou tabata dicidi pa Aruba cu mester a acudi cerca dje pa cualkier cos chikito. Aruba bou guia di e comerciante Henny Eman a cuminsa boga pa un separacion di Corsou pero cu lasonan estrecho cu Hulanda, un Status Aparte. Su grito pa Separacion a haya oido den tur skina na Aruba.

Ora cu e refinaria Lago y e waf – ambos a bin dor di intermediacion di Henny Eman – a establece nan mes na Aruba y a trece prosperidad pa e isla, e gritonan pa separacion a bira mas duro. Shon Henny Eman –mane-



ra e tabata wordo yama- a organisa demostracionnan grandi bou e lema Vox Populi Vox Dei. E voz di Pueblo mester a wordo scucha.

Na 1942 e voznan aki a crusa frontera y Reina Wilhelmina, kende a priminti e islanan cu despues di guera lo cambia e relacionnan colonial y lo bin un Reino nobo. Reina Wilhelmina a pasa su corona pa su yiu Reina Juliana na 1948. Pa por logra e anhelo di e pueblo, esta un Status Aparte, partido AVP a wordo funda e tempo ey. Su pasion Henny Eman Sr. a pasa over pa su yiunan y na 1941 e hoben hurista Shon A Eman a haci su entrada den politica. Entre september 1947 y januari 1948 tata y yiu hunto cu Aristide Wever a organisa 42 encuentro den club y casnan di hende pa asina colecta firma

di hombernan Arubiano riba 21 aña pa entrega na Su Majestad pa asina por cumpli cu e ferviente anhelo di e pueblo humilde aki. Den un tempo dificil na unda e infraestructura tabata laga di desea a logra haya 2147 firma. E firmanan aki a wordo entrega na La Reina y a forma e base di e mocion di 18 di maart 1948 ora Shon A Eman a haci entrega di mocion Eman na e miembronan di Mesa Rondo na Den Haag. Un mocion cu unanimamente a wordo acepta.

E realisacion di nos Status Aparte ta trabou di generacionnan di lidernan grandi, kendenan a logra mobilisa nos pueblo pa e causa aki. E historia di Status Aparte ta tambe e historia di e progreso social-economico y di e emancipacion di Aruba y henter e pueblo cu a duna



un man pa promove e causa aki, entre nan 2147 Arubiano cu a firma e peticion pa La Reina pa Aruba haya su Status Aparte.

Mayoria di e firmantenan aki ya no ta cu nos mas, pero nan nomber a keda graba den nos memoria y riba Plaza 18 di maart. 2147 homber Arubiano balente cu hunto cu lidernan visionario a pone e fundeshi cu awe nos ta baas den nos mes cas. E aña aki nos ta recorda cu 75 aña pasa e mocion di 18 di maart a keda entrega na Mesa Rondo na Den Haag. A dura casi 40

aña prome cu e anhelo di e pueblo a keda realisa dia 1 di januari 1986. Un logro di pueblo di Aruba, guia pa lidernan visionario. Nieto di Henny Eman sr y yiu di Shon A Eman, Henny Eman tabata e prome Prome Minister di pais Aruba.

Fundacion 18 di maart ta invita henter pueblo di Aruba y principalmente e firmantenan mes, nan yiunan, nietonan, bisanietonan, tatarnietonan y nan demas famia pa un bunita celebracion riba Plaza 18 di maart for di 9or di mainta te 10.30.